

實

政

錄

重刊風憲約序

風憲約者

中執法甯城呂公觀察三晉時  
所與郡國大夫約也編中提刑  
之條五十二按察之條二十總  
之飭吏治以奠民生要旨如斯  
焉已攷之元命苞曰刑者例也

說文曰刀守井也飲者陷井刀  
以守之割其情也繇天放已還  
艾服滋長而網滋密焉繁脂秋  
荼枿楊為市嚮非宅哀矜之衷  
乃平乃允茹恩于戴盆原情于  
噬腊鮮不濫矣故曰欽哉惟刑  
之恤曰治陳於刑而仁行焉則

刑之不可不慎也如此周官以  
六典簡群吏顯序邦政漢世歲  
遣使按部州郡舉察治行而又  
厯功能之詔嚴認舉之坐蓋詳  
矣乃至神雀五鳳間良吏為盛  
潁川渤海之倫廉平寬和廩廩  
德讓君子至今韙焉斯考覈之

明效已是編凡詮胥列摘事選  
言挈明慎之型標循良之鑒昭  
哉人牧之端鵠乎寧言三晉博  
之方隅銅墨之隘言不易矣不  
佞之以

璽書按梁也梁蓋號極敎乎異時歲  
游侵民委為道殣囂訟喧囂赭

衣黑幘已虛日間以一二幸民  
稚埋快不逞邑里為鼎一時長  
吏率驚虛聲而邀實意格以漢  
京氏之考則惴惴奉職者半計  
簿具文者半欺慢避課不在民  
者不數也哀此憚民更生之謂  
何不佞蓋惘乎亟取

公已試之約廣之茲土與司土  
者共之先民有言君子之行政  
也辟醫師之用藥然藥取其瘳  
病方不必自己出梁乎猶病者  
自腠理以至絡節靡不受病茲  
約固長桑之上池也寧論方不  
自己不以藥此察民哉唯我守

長丞尉披鏡此書守為吏范亡  
以拔薤先保嬰之愛亡以焚絲  
亟烹鮮之理亡以懸筭右閉閤  
之思廉以砥操慈以綏眊明以  
照祿慎以止辟刑也如山獄也  
如火矢心宣猶蘄壽民脉則中  
土之疾庶其有瘳觀風使入



報且有狀矣語有之曰不習為吏視  
已成事又云人願榮名諸大夫  
即希蹤古循吏之業思垂不朽  
之名也不佞則手是編與諸大  
夫約

萬曆癸巳夏栢人陳登雲書于  
澄清署舍

風憲約卷之六

提刑事宜

五十二款

本司執

九重法紀司三晉生靈凡笞杖以上訟不得其情刑不得其當者皆得提勘平反務俾生者無覆盆之嘆死者甘伏劍之心方為稱職昔孔子論德禮刑政猶分本末今德禮不敢問設以政道之而民不從即用殺吾猶忍邇來治世只恃齊之以刑四字耳果

皆道之以政者乎以刑齊之而當其罪即用殺吾猶忍邇來鞠獄只恃嚴加拷掠一法耳果自信無冤民乎夫人情一語之冤不關榮辱猶且裂眦急喉反覆辯白至指天誓日而不肯下况妄加鞭笞誤以徒流甚者釁九泉不化之氣為千古飲恨之魂乎夫決獄弗慎有司之罪專百十郡邑之刑名而駭然若聾瞽則提刑者非罪之魁耶所有應禁應行事宜願與百執事審圖

肱願與同志者共之耳意激切而語直慙  
褊急自慚然明罰勅法責在當司倘不厭  
煩屑而一涉眇一沉思油然而下膏澤以潤  
蒼赤即有深憾於余余固甘之矣仰府州  
掌印官即將發下書冊通行所屬正佐首  
領官員一體遵行勿得視為文具抄案依  
准呈來

山西等處提刑按察司按察使呂 為申  
明職掌以肅吏治以奠民生事照得本司  
謬膺風紀吏治民生皆有專責顧民生之  
未奠有六追呼苦於太濫問斷苦於太淹  
擬罪苦於太密追贖苦於太刻拘禁苦於  
太易隸卒苦於太縱此六者皆提刑事也  
吏治之不肅亦有六虛文日盛而實政亡  
厚道日隆而公法廢人事日精而民務踈  
頽靡日甚而振舉難憊昧常多而精明少

為家念重而為

國輕此六者皆按察事也本司履任數月本  
無意於科條邇來審聽諸獄觀察群吏賢  
者常半質美而意向不殷志確而才識不  
逮者亦常半下焉者不盡無也賢者嫌於  
自賢既不肯以所得告友邦友邦亦自賢  
也而不得聞賢者之告則當告莫若余余  
豈容終隱默哉昔余為令兩邑才短而心  
實苦其告百執事者誠非所能亦得之斯

焉此豈希王賀陰德避寧成陰譴要以

體

上帝好生之心將順

聖天子欽恤之意耳

人命十二款

一人命屍親不是父兄伯叔便是弟姪妻子  
被毆之日即自解衣眼同見證要見被毆  
之人年若干歲某月某日某時被某人某  
人用何兇器毆打某處見今某處斜傷長

若干闊若干某處圓傷橫若干圍若干青色紅色有腫無腫曾否皮破骨裂某某見証即照狀式告辜仍即擡被毆之人投遞到官官親相驗登記傷痕限以保辜日期責令兇犯尋醫調理案候在官身死之日即照狀式告檢官照辜狀原供傷痕依法檢驗如被毆不告辜限者除登時打死及在三月之內者姑准檢究外其餘死後告人命者俱以假傷騙詐及自毆誣人論不



准真正人命其辜限之日係隔月者要查  
大建小建此生死出入之界不可不慎也  
一人命招情批詳到日即時解任赴檢當場  
審定即日便具招申如承委官真係有疾  
及萬不得已事情文到當即具辭以便別  
委洗冤條令赴檢不許過兩時具招不許  
過當日可謂至嚴矣以後委官但批到三  
日不赴檢檢後五日不具招者官以才力  
不及註考其赴檢日期亦要詳開以便查

核若提問犯人所在州縣關到當日不拘  
拘到當日不發者問官即於申呈內明開  
占愴踈緩緣由庶罪有所歸不致相累

一獄貴初情謂犯事之始智巧未生情實易  
得數審之後買免多方機械雜出是矣須  
知初勘者何官果檢驗者掌印正官乎識  
見精明乎持法廉正乎鞠獄虛慎乎則初  
情乃確案也倘初委佐貳首領陰陽省察  
老人才識昏短而群小輕忽操守卑污而

供招苟且若是而初情寧可貴乎故招情不厭反覆要以求當而已成案無拘也

一檢驗之時承委官嫌其凶穢皆不近屍又犯人扭鎖跪棚多不同看惟有屍親忤作喝報屍傷或多增分寸或亂報青紅間有犯人與屍親爭傷而檢官竟不經目止執一筆為忤作謄錄耳及再更檢官再更忤作或暗賣屍格約與雷同分寸或意欲輕重多增疑似傷痕以致兩檢不同每駁四

五檢者終始未能歸一是死者既以挺刃  
喪命於生前又以蒸煮分屍於身後冤讐  
未雪暴露連年則檢官不慎之罪也以後  
掌印正官允遇人命事情嚴責吏仵眼同  
原被干証取四不扶同甘結便須萬分詳  
慎務使情節了然明白此心確然痛快庶  
生死兩不含冤亦省後來屢駁屢勘耽延  
累歲累苦多人耳

一有致命之處有致命之傷頂心顛門耳根

咽喉心坎腰眼小腹腎囊此速死之處腦  
後額角胸膛背後脇肋此必死之處肉青  
黑皮破肉綻骨裂腦出血流此致命之傷  
致命之傷當速死之處不得過三日當必  
死之處不得過十日若當致命之處而傷  
輕或極重之傷而非致命之處雖死於限  
內當推別情不可一槩坐死

一致命重傷當致命要處死於登時或三日  
之內原告干証定執某物毆某處只宜於

所毆之處檢驗傷痕既免死者翻屍又免  
生者冤誣何者人生一世自少至壯或失  
足磕跌或病疾捶按或生瘡被擊或負重  
着堅血不流行傷輕與新傷着骨則紅日  
久或消重傷與久傷着骨則青終身不散  
試將病死之人細一蒸刷果全身一副白  
骨則檢驗真足憑信近日問官全不理會  
原告證人本說耳根一下打死而渾身檢  
驗動數十處傷痕上司以傷痕不對為駁

辭問官增毆打情節為比對有左右傷痕  
尺寸青紅不差分毫者如以為毆豈兩手  
執一般兇器而對擊乎有昏夜醉後群毆  
而定執某人打某處者雖毆者亦不能自  
知其所毆之處不能自記其所毆之數而  
况證人乎大抵共毆只坐毆人因由檢傷  
只重原傷的處慎無刻舟膠柱致有冤情  
慎勿含糊摸稜致多駁案

一數批檢問非以求同正謂恐有冤抑相舉

平反耳近日承委官員不以人命為重或  
恐前官怨恨不敢異同或因犯者富豪不  
肯開釋或觀望上官之批語以為從違或  
描寫歷來之成案以了己事如此存心公  
耶私耶倘有毫髮冤情其罪重於初審何  
者獄情不始於我而死刑實成於我也  
天地神明豈無知哉以後委勘人命重事務擇  
正直仁厚官員持虛秉公細加鞫審或前  
官怨我立異或後官與我不同總付之無



心蓋衆官同勘一事原為此事虛實同勘  
一人原為此人生死豈以求媚人求勝人  
哉此心不克人品可知矣

一昏夜被殺見証無人及屍無下落者只宜  
案候密訪不可妄聽執猜鍛鍊成獄近世  
耻無摘伏之明多成附會之罪書曰罪疑  
惟輕又曰寧失不經夫以皋陶為士安有  
罪疑不經之人何可寧失古人猶過慎如  
此吾人未必過皋陶柰何必欲牽合羅織

以成人之死耶人命至重鬼神難欺慎之慎之

一解審多係重情或隆冬盛暑或險路長途或老幼病人或婦人隻身民間疾苦多少難言問官發解止摘緊關且如人命正犯一人屍親一人要緊干証二人或的當一人足矣中間干連徒罪以下及徒罪以下干証及供明人等盡數摘發寧家賊情除正犯外只解失主及寄賊之家其餘別無

要緊若人命除正犯屍親外盜賊除正犯  
失主外解審過三人者問官之才力可知  
中間如有情節不盡者招後明白說云除  
其人係老病某人係輕罪某人係供明不  
在緊關之數相應免解外今將某某等取  
問罪犯

一屍親遞攔辭除卑幼於尊長須要根究明  
白斟酌准理外其親祖父母之於子孫夫  
之於妻但遞攔詞免問者果非致命破損

重傷死於當日不必過於搜求即與准理  
立案備照其人命事情屍親未魯遠出不  
當年告發而告於一年之外及不係有服  
之親而旁人訐告及不係正告事情而擊  
於切思之下開於粘單之中者不問虛實  
俱不許准理如有妄准以興大獄以擾多  
人者問官之不肖可知矣

一槩省重囚不下千餘起本司職在伸冤理  
枉各犯豈無抱屈含冤法當解審恐有疎

虞止據招冊何由得實該州縣衛所衙門  
既官此地聞聽易真且典其獄審鞠尤便  
文到之日要將在監重犯自到官日期原  
發卷案逐一檢閱要見原告初時如何說  
話後變何詞干證初時如何供稱緣何反  
覆初覆問官是否賢能有無別故承行吏  
書曾否受賄輕重情辭檢驗傷痕重輕緩  
急果否致命搜獲贓物顏色分兩果否極  
真仍提本犯干証失至屍親一一細審仍

於意外拘隣佑鄉甲款款詳推但有矜疑  
即將招冊只用簡明畧節逐段畵批務在  
得情不厭繁碎完日申呈本司一以見本  
官盡心獄事一以見本官才識精明果可  
平反即當轉呈或另行駁問或

題請踈枷此有司第一急務也若厭其繁猥止  
據成案註一審語其誰不能倘本司細閱  
情由與州縣相反而得其實者即將本官  
指事註之下考兩起以上者定行叅降

一近日有等奸民買屍做傷妄告人命訪得人家新塋問其是女是男多者數十金少者十數金貪財奸民不顧血屬情願賣與檢驗自己投作証人又買仵作以白礬蘇木黑漆五種製造淺淡青紅等傷任口喝報檢官既不經目即看亦不細察曾有誣成大獄此係法外之奸故無擬罪之律以後問官審出真情買屍賣屍俱引開棺見屍律問以死罪其賣者仍分有服無服卑

幼尊長依律定擬決不可止擬誣告徒罪  
既不得律意且無以懲大奸也

盜情上款

一地方失盜保甲人等負疎虞之罪快壯人  
等懼比較之嚴彼此扶同胡疑妄指即將  
平人及曾為竊盜及乞食貧民巧拏恠鄉  
異拷嚴鞫手執失單逼之招認不合則捶  
楚亂加偶合則令招夥盜既招則狎使同  
拏仍照前法榜掠致令展轉相誣甚者授



之口詞使之攀咬夫真賊不苦審固不難  
承良民受非刑何所不認然則杜快之言  
何可據哉以後快壯拏賊除真盜拒捕曾  
毆公差許其打傷不罪外其餘止許綁縛  
鎖銬到官掌印官先驗傷痕如拷打骨肉  
有傷者快壯重懲革役有致命重傷者不  
分盜之真假限內身死者許家屬告發定  
擬償命

一真盜所招夥盜須差快壯訪拏此輩一執

紅票間閭所至驚憂賊未獲則攀其旁親  
遠族同緝或誣其妻父母舅窩藏索足財  
貨酒食仍令遠近跟捉拋家廢業騷擾多  
端賊既獲則逼令攀咬富家寄贓盈其谿  
壑之求或指授讐人同盜使受敲朴之苦  
株連蔓引人人自危及事定告官而昏庸  
有司私其快壯仍罪告人深可痛恨以後  
快壯訪知真賊所在即稟所在正官同所  
在地方保甲同行捕捉所在官不從致令

賊逃者申究但不許牽累以上無干平民  
官不嚴禁致令被害之家赴告本司得實  
者掌印官以才力不及叅降

一鄉約保甲法行家家盡在稽掩之中雖傭  
作乞丐之人動靜出入不能欺同約及一  
甲四隣耳目假使平日為盜即當闔約報  
官平日善良而被賊攀誣者即當闔約保  
救要見某人平日本分生理全無非為某  
家某日失盜本人某日在家如虛同罪甘

結到官問官即當存結聽保如後訪得實而本犯脫逃者保人一例重究仍責緝捕惟是同約之人皆是盜賊便無可柰何倘一鄉不為盜豈容一人為盜而百口保之哉即不敢公訐為賊亦不肯公保真賊矣一賊犯到官便須親審近見幾處掌印官憚於任事懶於推鞠輒批佐貳首領等官令之摘詞具獄彼官小而不擔當識庸而不精細惟快壯為指揮以夾打為上策况審

賊而原捕在旁但聞一語稱冤快壯且喝  
且稟甚者恨其反覆討出外面從新拷掠  
具招上堂彼數經殘創已自消魂非係潑  
耐之人誰敢堅執辯訴掌印官十九抄其  
原供通詳院道如近目祁縣黃典史情未  
問真腿已夾折深可痛恨以後掌印官肯  
不親問只批佐貳者即係極不肖官員無  
論有冤無冤以才力不及叅降三次不改  
者叅究拏問

一掌印官審盜惟在隔別細心查其情狀蓋  
真偽之情辭色自別虛捏之語辨問則窮  
我多方以辯之則掩護之術不及卒備無  
備之言不及會同往復參錯真情自見至  
於隔別之報盜數同賊數同期會同事  
跡同即無賊而盜可知矣或言人人殊不  
可驟加嚴刑亦當耐心細鞫或設法密訪  
人命之疑獄亦然仁人心苦智者識精當  
必自有妙法但問刑謂之審具招謂之辭

詳審二字此聖王治獄之精意也今之  
獄者幸於此兩字留心焉無以夾棍等酷  
刑為第一審法則冤獄必少矣

一失主通失狀未必一一皆真譸張者甚多  
而貪冒者居半起贓之時快壯通同有將  
本人之物勁指為贓者有比照朱狀取一  
二於典當舖以作贓者有獲真贓而快壯  
先搜其細軟入己者有疑似之物失主記  
不真而錯認者有明見可愛之物而妄認

者有厭連累之久而妄認一二贓物獲賊以完已事者有為快壯所逼不得不認者蒼南呂公云余巡海右時有一寡婦被劫獲盜十人搜贓俱在內有女鞋一對快壯過寡婦家謂之曰鞋當有樣從之及縣官審贓寡婦一一俱認問鞋曰我女之鞋也問大小幾何曰有樣索家中樣比之不爽毫髮十人者無一語辯臨刑不數日矣而真盜悉獲真贓悉出十人者乃得釋前誠



盖十人家物也近日有將良民為盜搜其  
家黃裙指為失主物者失主認之太原毛  
通判取當舖黃裙數腰雜置堂上失主莫  
知所認妄取不一呼良民至則應手而得  
曰此吾裙也失主無辭而良民遂釋以後  
有司審賊不可草率但失主賊物無記驗  
者不可輒坐真賊盖指一物殺一人可不  
慎與

一近日盜賊招冊有賊無分毫供稱花費無

存者要見賣與何人須拘何人辨認花費  
無存四字豈宜殺人哉至於銀錢雖難辨  
識若本極貧之家忽然使用方便要見財  
物何處得來情自難掩諺云指賊殺賊如  
無賊而稱屈寧舍賊可也

一近日治盜有情未真賊未獲而死於杖下  
者有供招未具而死於獄中者招中泛稱  
陸續監故天道有知人之子不可獨殺今  
後除情真賊真詳允奉決者不拘刑死病

死聽其領埋外其贓狀無指及情節可疑而  
死於獄者許屍親告發問官即係昏庸  
酷暴輕者叅呈降黜重則定擬故勘平人  
之律決不輕縱

一首盜之人不可盡信有首夥盜而誣一二  
讐人稱為同盜者有本身非盜而受奸人  
買囑假稱首盜妄攀平人者問官傾信其  
言盡拘苦審徃徃搜賊不獲死於嚴刑奈  
後首賊但有一人不真者審有誣陷別情

不准出首之律仍問死罪

一真盜脫逃拏家屬送監蓋其妻子平日享為盜之利忘勸救之言無首報之舉即使監追亦不為過至於真盜所報夥賊縱使脫逃原無贓物亦將家屬送監已欠分曉甚有將父母兄長送監者古者罪人不孥况尊長乎有將翁壻姑舅送監者彼且忘其骨肉况踈薄乎此皆殃及無辜治獄之惡政也以後攀報在官而贓物無指者但

許案候從容訪拏不許將家屬送監即係  
真盜脫逃不許拏尊屬遠屬送監倘真盜  
妻子監死獄中即准抵罪不許更監別屬  
逼要真賊違者以酷論

一世無窩主則盜無潛踪盜無定在而窩主  
有定在盜難知而窩主不難知有司肯嚴  
保甲鄉約之法或行密訪首許之令但拏  
真正窩主一名者即於本犯名下追銀五  
十兩充賞自首改過者免罪以後本州縣

窩主別州縣事發者即將窩主所在掌印  
官以昏庸叅罷

姦情四款

一姦情原無証見易証而難明故律稱非姦  
所捕獲勿論姦婦有孕罪坐本婦者蓋慎  
之也以後凡告姦情即本婦招承亦勿准  
理安知非本夫逼使騙賴又安知非本婦  
有所希圖乎且婦女不至有孕即姦亦勿  
問姦亦所以全婦女之名節而免凌逼之

性命為人父母不當如是耶若淫奔在逃  
及被人捉獲則無詞矣

一強姦不分已成未成致逼婦女自盡身死  
指證若真法宜坐抵何者強姦已當問絞  
况因姦致死是二辟也何可輕縱若婦人  
及年十三歲以上女子姦雖已成而婦女  
無恙又不聲說則強和皆未可知有情雖  
和而事發激羞因而變怒者有因他事失  
好因而挐姦者有因至其室迹不別嫌報

讐貪利而誣姦者至於晦夜不識面目而止據音聲衣帽得於竊取而指稱奪獲皆不可草率坐姦以後問官凡婦女以和姦發覺激羞自盡或被父母夫毆打因而自盡身死者逼非姦夫又無威狀難以因姦威逼致死坐姦夫之罪蓋和姦之罪兩杖彼姦婦事發逼於別人姦夫自有應得罪名耳

一上無教化則下無見聞如兄收弟妻弟收



兄嫂及雇工人姦家長妻者於法各死愚  
民皆不知也乃有兄弟亡而收其妻謂之  
就和父母主婚親戚道喜者世道不明罪  
豈專在百姓哉凡遇此等獄情有司自當  
審處何人主婚有何證驗仍先將律法徧  
曉愚民有改正離異者免究勿聽訐告之  
言輕成大獄也

一貧家男女易雜小民名節多輕非若士夫  
之家嚴內外以遠別有禮義以養心故愚

民貧民不可遽責以聖賢之道允決此輩  
姦情不可細拘文法當有法外之精意焉

監禁

十款

一囚犯奉有決單自當明正典刑是以未決  
之先貧者有囚糧病者有醫藥夏則灑掃  
以防瘟冬常溫煖以禦寒

聖王豈不知其人之當誅哉以為既有臨時之  
死且延一日之生故曲加體悉如此耳近  
日有司踈於治獄有獄卒要索不遂凌虐

致死者有讐家買求獄卒設計致死者有  
夥盜通同獄卒致死首犯以減口者有獄  
霸放債逞兇滿監盡其驅使專利坑貧因  
而致死者有無錢通賄斷其供給有病不  
報待其垂死而遁病呈或死後而補病呈  
者倘係真情罪當之囚瘦死猶可中間有  
抱冤待辯之人株連未結之罪一槩死於  
獄中所傷天理不細以後獄囚有病先取  
囚親告治結狀調治不痊後取屍親告領

結狀一併粘連申詳本司方准開除無親  
人者以里長甲首隣佑代之其強盜失迷  
鄉貫原無親族里長者取刑房吏告治病  
呈及醫生病案粘申如無以凌虐罪因論  
一有司錢糧原不寬綽若囚糧一槩全給豈  
能人人均沾年年常繼今擬分為三等除  
罪大惡極死有餘辜者不准給家不甚貧  
有人供應者不准給外有情稍輕而家極  
貧或無家供應者給與全糧情稍輕而家

次貧日用不足者給與半糧至於新獲賊盜真假未分果無供給亦常有虞若監故未成之囚甚於奉卑之罪倘被告發定擬故勘

一一朝之忿斃人於頃刻百年之悔無由而改圖此等死囚情猶可憫有一入獄而父母妻子不復得見者有送飯到而不知誰接誰食者昔人有念囚無嗣不禁妻之出入而令其有子者此雖不可為常至於應

監獄考 三  
聽家人入視而不聽律有明條今三法司  
重囚每月令家屬一對面任從談叙家常  
待其辭畢方許收監婦人臨決將產滿月  
而後行刑

聖王仁及圜圉蓋如此有司若懷泣罪之心行  
哀矜之政使法不踈縱而情不鬱抑豈患  
無術哉第恐念不及此耳

一有司習於故套拘攝人犯動送監倉不知  
一人在禁一家憂忙或有老親而無妻室

者或有少婦而無子姪者或家貧路遠不能供給者或家有病人或身自抱病者或冬寒而身無綿衣者或空手枵腹無錢打點牢獄者即使其人當死亦應曲體其心況於輕小事情豈宜泛繫之獄為民父母亟宜念茲各該府州衛縣衙門除死罪及充軍擺站人犯及入官還官贓物俱應收禁追比外其有力徒罪及杖一百以下贖決等犯止令干証保領聽其寧家轉辦限

期完納雖係院司各道紙贖俱不許倉拘  
正犯及濫將家屬監追違者列之下考致  
有獄死者以酷刑叅究罷斥

一監倉二簿只宜掌印官一本其佐貳首領  
官應送監倉犯人俱要稟白堂上同簿附  
名掌印官每遇票目便將二簿查閱一遍  
其人某日監倉有無得所應否釋放何以  
處分徃見一縣令懶於問辭輕於聽信拘  
到人犯皂快稟收監倉即收監倉佐貳首



領各有監倉簿籍要送監倉即送監倉甚  
者監倉皆滿而送之令鋪者有燈節醉爭  
至除日猶繫獄者緣一簿經年不一過目  
吏卒因循不肯稟白甚者催比錢糧花戶  
坐倉以數百不知令何人轉辦也吁可恨  
哉賢有司試一思之

一婦人非犯死罪切無繫獄非犯姦情及不  
孝應出為舅姑夫男隔訟切勿拘喚蓋男  
女有別廉耻為重皂快一拘婦人無窮之

利婦人一入公門無限之辱拘摸戲狎無  
所不至有因之而喪名節者居官誰無婦  
女豈應獨忽民情至於死罪婦人徃徃為  
獄中吏卒所占此最難防須時時密察而  
重懲之

一七十以上老人十五以下小兒及身有疾  
病家有新喪者不係勘合及重犯不許輒  
送監倉

一監中墻屋破壞有司即申呈合干上司估

計修理仍須蓋病房一處凡遇一囚瘟疫  
即送病房調理毋令傳染

一司獄官刑房吏禁子等役不稟白掌印官  
而擅打監倉人犯者拏問重治

一及獄越獄惟強盜為然而夜防尤要近日  
有司常不下監牢頭禁卒日久情熟安常  
心急夜間囚犯既不入梠床又不上鎖鍊  
彼賊無一念生理心懷百計脫逃虎兇出  
梠非掌印官之過與若使手足不得利便

精力不得壯強出不測而夜查監牢遇  
疎而重懲典守時刻兢兢豈有反獄越獄  
之變哉以後但有疎虞有司定照條格重  
究

聽訟十二款

一民間苦事莫甚於株連徒訟乃民往往一  
詞牽告三二十人報讐網利中間緊關犯  
証十無二三此等奸頑豈宜聽信各掌印  
官允遇受詞日期俱要當堂審問無干者

即與勾除毋得一槩發房出票累苦小民  
一勾攝犯人動差皂快此庸吏之套習實小  
民之大殃也近日革弊愛民之官多用原  
告自拘夫兩讐相見勢必起爭妄稱抗違  
以激官怒亦有添差地方保伍同拘者此  
是換名之皂快需求凌虐與皂快同至於  
原告係是婦人自拘尤為不便若止以原  
狀或紅票付告人令其遞與干証干証持  
之呼喚被告約會同來果係冤誣聽從被

月無公事  
三  
告訴狀至日同理則干証者事內之人畢竟不免到官彼若有所需求自是有人買囑亦不恃勾攝之勢矣是問閭省一息快之害而公堂餘一差遣之人也賢者試一思之

一上司批詞果係徒罪以上方許差人勾攝凡公差勾攝往反百里者不得限過三日若第五日不投到者計日加責仍問犯人有無需索凌霄或用十數手牌上書公差

有無需索凌虐七字其有無二字令犯人  
自填聽審之時執進庶限近不得久行吞  
噬防嚴不得大肆貪殘即不能盡革奸弊  
然省一分一分受賜省一人一人免害矣  
息快拘人到城引領相識飯店任情破費  
酒食招包娼婦心滿意足纔來投到或妄  
稟人犯不齊或指稱關卷未到有司不察  
或令各討保人或令原差帶押甚者掛搭  
輪押經年累月放趙甲而留錢乙賣正犯

而拘家屬種種擾民皆問官惰慢之罪以後詞訟無論難易拘究但過三月不結者問官以才力不及註考

一吏書騷擾科索全憑牌票有司硃押牌票多不經心彼或乘忙倦之時或當微暖之會便將一二百張口稱未完前件用印判日中間言語輕重任其亂寫事體緩急任其報票紅單一出打點即來遂意則將票停閣不足則再三寫催有司信實何曾查



某事曾催幾次某稟有無回銷哉監司騷擾郡邑守令騷擾閭閻此居其半掌印官將一切前件到日分急中緩三等為三袖摺責令該房自限某事何日可完即註摺上難完者許其稟官易完者照限督催分別既明方准出票有司每日看摺勾銷前件一事完即勾一事違限者計日加責是官斧而吏鑿也彼且辦事之不暇而何暇愚我以行私哉

一問事以投到先後為序不許吏書以受財  
多寡為後先但本日投到者本日即問雖  
極忙不得過二日其狀內情節罪名未問  
之先預為料理一問之後即時盡供當堂  
分付某人應徒幾年某人應杖幾十審力  
有無填寫印票無力者即時杖釋有力者  
令其自限何日完納即將發落單票付與  
干証令其催納如果難完干証至日改限  
盖干証住居多與犯人相近押保催納最

為便宜不猶愈於臬快乎

一凡審賊審力先看犯人力量如果力量不堪干証不肯保押者多係貧難棍徒入官給主之賊不宜多坐仍不宜逼認有力以致追迫太苦前件難完上下俱不便也

一律有五答之罪世豈無犯答之人近日問官全不引用答律只用不應得為而為又只用事理重者至於下不合二字全不照管律條如閭閻傍人則曰不合不行勸阻

徒夫在逃則曰不合鎖押乞食招如此類甚多皆是律外生清科索無罪以後律條無罪而妄下不合字樣及有應得罪名輒用不應得為而為事理重者不分批詞自理俱以違

制濫科先拏承行吏書問官另議

一凡問事畢係申詳上司者除擺站以上拘禁候詳發落外其餘即日釋放止令歇家報名聽候詳允之日將發落單票給與歇

家轉付干証討限完納不許一槩羈留其  
事在別州縣者移文別州縣催納實收即  
令申繳如有違延者許問事衙門呈究  
一犯人發驛原為工作如京師炒鐵運炭之  
類近日恐其逃走止令押鎖乞食甚失本  
意以後徒罪人等有做一切官工者官給  
飯食一日准一日自備飯食一日准二日  
有情願驛中奔走効勞者與做工同申准  
原批司道折限滿日釋放

一發配名輕於充軍而實等於死罪彼慣奸  
積猾或買免驛吏或挾制驛丞或尋情囑  
托公然在家覓人點站不待言矣其窮苦  
老疾及家中無供之人乞食不前坐卧濕  
地或官吏要索橫肆凌虐至於傷命只報  
相埋情甚可恨近日問官有因誣告人獄  
罪加三等而入於徒者誣告死罪未決何  
以加焉此泥於法而不達於理者其官之  
才識可知驛官如遇病囚即申州縣調理

或掌印官驗明姑令保放調養或將  
縣調養病痊照日補役但不呈州縣而  
報死者該驛官吏以凌虐致死提開罷斥  
果係別情者定擬抵罪

革前應赦罪犯被人告發者或財物當給  
主或地宅當還人依律處斷重加責治可  
矣近見各衙門徃徃以萬曆十年以前事  
犯擬罪而吏犯赦前過名依舊降格甚悖  
明詔問刑衙門不可不知

用刑數

衙門刑具載在律條其數有六笞杖訊枷  
杻鐐無論笞杖即訊亦號為極重矣大頭  
止徑四分五釐其用止於重罪不服其法  
止於臀腿分受至於笞杖止加於臀而已  
不及腿也近日各衙門用重大竹筴不去  
稜節聽從惡卒任責腿灣多者三五十或  
內潰割肉或筋傷殘廢此惟法司懲創極  
惡大奸百一用之郡邑職在牧民常刑當



如是耶但竹筴通行已久不能遽革以肆  
奸頑亦當分為輕重三等每板臀腿分受  
十板以上兩腿分受何處非肌膚何肌膚  
不痛楚而必欲殘民以逞哉如不係極惡  
大奸萬民所恨而仍前槩用重大及數多  
加力又叢於一處擅及於腿灣者無問曾  
否傷人定以酷刑叅罷

一枷有三等死罪重不過二十五斤徒流二  
十斤杖十五斤夫枷非令負重止書罪名

於上號令示衆而已故曰枷號至於一百  
斤一百二十斤大枷於例雖有用亦不常  
今後各府州縣百斤重枷不得輕用應枷  
號者照律置為三等不許一槩輒用大枷  
違者以違

### 制論

一人身之用手居其九若懼有疎虞大鑊嚴  
鎖牢絆兩足可矣至於木杻非死罪男子  
始用充軍以下例不械其兩手念人情之

便也婦人雖死罪不扭謂飲食便溺不可  
托之他人重男女之別也以後各有司衙  
門非犯死罪男子不得一槩用扭以傷  
朝廷體悉人情至意

一夾棍扛子腦箍拶指攢板原非應有刑具  
近日問官有心不精細性不耐煩者盜不  
分強竊人命不分真偽一入衙門只靠夾  
拶酷烈之狀不可盡述以後衆証明白事  
情端的而展轉不肯招承者間用此等刑

具夾不得過一次扛不得過三十梭指不  
得對兩頭夾梭不得過二時腦箍定不許  
用如違不分有無傷人定以酷刑署考情  
重者叅究拏問

狀式

揭帖粘單除鄉約保甲公報外  
其餘俱不許准行以滋擾害

古者以金矢聽辭皆懸式於象魏不者有  
誅惡無情也通刀風日甚狀中叙事僅數  
語而形容彼罪張大我冤常居十六冀駭  
聞一受耳不知波及蔓引則無辜者為殃

此多贖之藉而小民之憂也今定為式各衙門一體遵行倘違式濫准官可知矣

凡各府州縣受詞衙門責令代書人等俱照後式填寫如不合式者將代書人重責枷號所告不許准理

人命告辜式

不許多報一處不許妄增一分違者看明重究路遠告辜不得過五日

本縣某里某人為毆傷事有某父伯叔姪兄弟妻子年若

千歲本月某日某時與某人為某事多不過四字

相爭被某執拏磚石金刀他物或用拳脚將某父伯叔姪兄弟妻子頂心打

有斜傷一處

青紅色

長若干闊若干耳根打

有圓傷一處

青紅色

骨有無破圍若干橫若干見

今

不着床

某人某人見証為此擡扶到官伏

乞相看案候保辜責令本犯尋醫調治上

告

人命告檢式

本縣某里某人為人命事某月某日有某

父翁叔姪兄弟等

被某人毆打傷重某醫調治不痊至

某日某時身死除傷痕已經報官案候外

伏乞檢驗施行上告

告盜情狀式

不許多開一物不許多報一盜違者重究仍不准

某州某縣人某人為盜情事某月日 更

時分不知名強盜約有幾名各持兇器透

邊房暗偷出或打開門將某物某物若

干件係甚花樣銀錢若干數整銀散碎或

或輪姦保甲人等俱未救護或追趕不前

伏乞案候嚴拏上告

告辯盜狀式

某府州縣某人為辯冤事某平日作何生  
理原因某事四不過與見獲賊犯某人有讐  
某人某人知證某日某夜某實在某處何  
幹某人某人見證今被某賊攀誣同盜况  
某見在某鄉約保甲管教乞批本約查訪  
平日果否非為容其保救庶不苦死黑獄  
上告

告姦情狀式

某府某縣某人為姦情事財娶到妻某氏



或妹某名年若干歲被某人誘姦日久擄  
到某地方潛住或云強姦不從見打劊其  
處傷痕或強姦已成見扯破何衣奪下何  
物氏喊叫何人聽証或不堪羞忿某日某時自縊刎後并身死某人某  
人証上告

告打詐狀式

某府州縣某人為打詐事某月日某人某  
人指稱衙門將某拏住指何情由用何兇  
器在於某處拷打見有某傷詐去財物若  
干某人某人證上告

告地土狀式

田宅同賣過十年者不准

某府某縣人某人為地土事某年月同中  
某人某人買到某人畝地若干價錢若干  
已經過割被某人侵占自量得幾十幾畝  
幾分幾釐隣佑某人某人證上告

告婚姻狀式割襟換帽原無聘禮者不准

某府某縣人為婚姻事某年月日同媒某  
人將第幾男某人用財禮或聘禮若干定  
某人第幾女小名為妻一向

未曾行禮至  
行禮幾次

某月日不行知會用某人某人為媒改定

與某人為妻未曾經成婚上告

告賭博狀式自告者不准

某府某縣某人為賭博事某月日某人某

人幫其子弟姪陸續贏去錢若干物若干賣

房地若干某人開場見奪攤場某物上告

告凌奪狀式孤幼被人凌奪同此式

某府某縣某人為凌奪事氏某年月喪夫

有子子女遺下房若干地若干頭畜若干情願

守節被某兄伯叔上門打幾次罵幾次奪賣

某物又將氏賸許某人強來逼取某人某

人證上告

告保盜狀式

盜不在鄉約保甲者即係奸民犯  
盜不准保救

某府某縣鄉約保甲隣佑某人等共百

十人為冤枉事本約幾甲某人平日

作何生理本分善良並無非為等事委因

與某有讐或係快壯某人詐財唆咬伏乞

審明保在倘有徇情懼惡妄保真賊者事

發某等同罪脫逃某等訪拏結狀情願入  
招粘卷所保是實上告

告貪污狀式

某府州縣某人為貪污事某年月日為荷  
緣故被某吏官某人詐索某銀若干某人過付

可審上告

告故勘狀式

某府州縣某人為故勘事某年月日被某  
吏挾讐詐財故將某人拘拏監禁身死指

某人証上告

告科歛狀式

某府州縣某人為科歛事某年月日被

官或中軍千把總旗牌千百隊長某人某

人指稱何項名色科派某人某人銀若干

某人審證上告

告侵欺狀式

某府州縣某人為侵欺事某年月日被

斗級大某人收掌某項銀物某人侵盜或於

內侵欺若干指某人某簿審證上告

告賣軍狀式

某府州縣某人為賣軍事某年月日被兵  
房謾某人將其衛逃軍某人受銀若干隱  
匿不解却將隔里平人妄拿項解指某人  
與軍黃冊證上告

告飛軍狀式

某府州縣某人為飛軍事某年造寫軍冊  
被某里

里老  
書手

某人受某都某衛軍人某人

銀貨若干將軍以同姓飛入本里見今將某  
拘拏指某年軍冊證上告

告包攬狀式

某驛馬戶某人為包攬事某年月日被本  
驛積年把持驛遞某人包攬某人馬騾故  
不走差指某人與差簿證上告

告窩訪狀式

某府州縣某人為窩訪事被某人專一纂  
捏無影事蹟交結訪事人役某年月日挾



騙某人<sub>物銀</sub>若干指憑某人證上告

告土豪狀式

某府州縣某人為土豪事某年月日有某

缺餉向某借

<sub>銀若干兩</sub>

羔利過本幾倍伊

將其私家拷打逼將<sub>妻妾子女房地頭畜</sub>准折指某

人證上告

告財產狀式

某府州縣某人為財產事某<sub>祖</sub>某故遺下

<sub>房幾所地若干畝資本銀若干兩首飾衣物若干件</sub>

應該某與某<sub>叔伯</sub>

或兄照枝派均分今某某倚恃尊長盡行霸去不分指遺約或親隣某人證上告

### 告錢債狀式

某府州縣某人為錢債事某人因缺用於某年月日向某借去銀若干兩加三出利指中人某人并借約證今某人至今幾年本利分文不還或止還本利若干尚欠若干屢討延調不與上告

### 告欺害狀式

某府州縣某人為欺害事被某與某素有  
某隙今某倚恃豪強於某月日將某無故  
羅毆指某人證又至某月日暗將某成熟  
田苗用棍撲倒約有幾畝上告

### 告唆誣狀式

某府州縣某人為唆誣事某里某人與某

或地土相爭酒醉互相爭以此結讐指某人證今某或

盜賊或人命事犯被某唆某將其掛告同盜毆乞

准審豁上告

告詭隱狀式

某府州縣某人為詭隱事被某里某人將

自己地土

詭隱寄

若干

躲避重差  
減扣額糧

某人或

黃

冊證上告

告抗糧狀式

某府州縣某人為抗糧事某人見種地若

干糧石至今

升合不納  
妄作荒逃

致某

受比  
賠累

乞准拘

究仍將揭過銀兩責令本犯起利上告

告重收狀式

某府州縣某人為重收事庫使某人徵收  
某項錢糧不遵部司法馬大等高稱每兩  
加耗若干某人某人證上告

風憲約卷之二

按察事宜 二十款

夫潔已愛民修政立事有司之職也按問  
不法察舉失職本司之職也今府州縣衙  
門繫之承宣布政使司而按察司下不繫  
焉者何布政司其統屬而按察司其監臨  
也統屬則倡率之任專監臨則糾察之權  
重故按察名司按察其所司也今按察司  
若贅疣其失職也甚矣已則失職而望守

令以盡職也不亦難乎今欲修吾職未有不笑且駭者不修吾職則吾愧且懼伏覩累朝制書所載本司職掌如云有司箴官法守奉公廉能昭著隨即舉聞若奸貪廢事蠹政害民者即便拏問其應請

旨者具實奏聞若知善不舉見惡不拏杖一百發烟瘴地面安置吾職之不修安得不懼當紀法陵替之後慮陰傷憂反噬隱忍煦嫗而從俗以苟此官安得不媿是居已於

贅疣而自失其職非有司之過也吾姑與  
之約約之而駭我笑我也即

國有昭憲我罪且無辭矣而何暇恤百執事  
哉

一

朝廷設官本以我從民非強民從我故曰從欲  
以治又曰同民心而出治道惟是糧差不  
能從其逋負奸暴不能從其橫恣本業不  
能從其惰慢風俗不能從其薄惡如斯而



已至於一切舉動須先謀及士夫謀及閭閻必衆謂當為然後修舉必衆謂當革然後改圖又權利害之大小念興廢之始終若意雖愛民而不合人情拂衆以始禍心實為善而不諳事勢妄動以擾民或信堪輿禍福輒興不急土木罔恤從事之勞或因一二詭隱便欲槩縣清均又滋無窮之弊諸如此類不可殫述雖於品格無虧實於生民有損是曰喜事之吏

一

朝廷張官置吏凡以安民故擇一守而付之郡  
則無憂於一郡擇一令而付之邑則無憂  
於一邑誠謂作養賢才選擇廉幹足以分  
吾憂而慰民望耳且環郡邑士民無貴賤  
小大婦人孺子皆稱之曰父母祖父母謂  
其子孫我也為有司者果能有一腔不忍  
人真真實實底熱心腸視彼小民知癢知  
疼如兒如女刑民若加諸身費民如出諸

已見饑寒困苦者酸鼻痛心如自家子孫  
失所見昏愚兇悍者撫膺頓足如自家子  
弟顓蒙汲汲皇皇既有此美意晝思夜想  
何患無良法書云心誠求之不中不遠吾  
輩才即有短不短於婦人民間事即難知  
不難於赤子特患無此心爾近日有司愛  
民者固多亦有見百姓困窮盲爾全不動  
色聞民間抑鬱衰然了不關心所謂君民  
一體好惡同情者豈徒泰然棄於民上而

已哉是曰木痺之吏

一政體主於寬厚政令全要嚴明故君子之德風坐於一堂而四境之內善良氣伸奸暴股慄四境之外盜不入疆民皆復業者風之謂也今吏之貪鄙者姑無論即有存長厚之心鞭朴不事嚴狷介之守苞苴不通豈不仁廉君子哉然而吏書為奸弊端叢出皂快肆虐詐索公行指賊者考掠徧於閭閻行暴者毆奪橫於市井剽竊滿路

雞犬不寧追呼盈庭農桑盡廢彼如木偶  
在堂既不能為柔良出一冤氣又不敢為  
奸宄發一惡聲堂下誼誨無復一毫之懼  
案邊撥置不殊衆楚之咻郡邑安用此人  
為哉是曰昏庸之吏

一近日民窮財盡百姓但存皮骨苟軫饑寒  
困苦之念自無豪奢愉快之心彼浮夸者  
酒席欲其豐美又好張筵下程極其整齊  
又濫餽送金鼓旌旗滿路詫兒女之懽聲

絲竹劇戲誼筵競俗人之好尚或為身家  
之奉百事求精不遂則恣行撻楚民有因  
坐褥圍裙而賣兒女者或狗耳目之欲動  
輒修造不足則橫肆科罰民有因建館修  
亭而喪性命者古帝王露臺惜金蒸羊念  
費孰非百姓膏脂乃欲悅吾耳目誇張侈  
大縱欲殃民是曰耗蠹之吏

一廟堂之事備於郡邑故一日常萃百責萬  
姓賴我一身即日宣上德不無戴盆之民

日達下情猶有向隅之泣縱使政簡地僻  
豈皆事理民安夫怠心一生則無所不已  
留心一想則何事曾行乃有心不關民社  
飲酒賦詩口不問農桑飽食高卧斛斗秤  
尺任民大小輕重文移簿書任吏沉閣耽  
延上官之牌票屢催常不入目下民之繫  
逮累月多不寧家憲綱呈送所以驗政績  
也何曾體認憲綱而前件項下不曰見今  
則曰並無須知領來所以示法守也何曾

細看須知及大察到時或捏遵行或捏完報百事無成四境不治是曰惰慢之吏

一官員除授不於本鄉豈不念夫馬勞費道路奔馳曠廢時日哉固以為踈薄隔遠之人無鄉曲故舊之雅得以冷面公心易於奉法耳為有司者上可以對天日下可以信士民然後為正大公平之政今也大戶等重差火夫等雜役濫免多免盡加派於窮民夫馬等私恩賑貸等實惠私與私求



盡便宜夫豪猾催科寬士夫之包占聽斷  
受貴達之囑託甚者以勢力之大小為曲  
直以人情之炎涼為出入使柔良抱冤貧  
賤負屈藉法市恩難俾人心之服徇情報  
怨益傷天理之公汝顧忌以保官民抑鬱  
而受誣豈容於堯舜之世哉是曰柔邪之  
吏

一郡縣之政非為國則為民監司於郡縣無  
非督以為國為民之事其實心實政有司

上之所責成正彼之所欲自盡者也見合  
則意氣相孚共求底績見不合則反覆呈  
請務俾宜民彼粉飾彌縫者則不然文移  
隨故套申呈意念不及簿籍任吏書填造  
耳目不經操持本有玷也而報十一羨餘  
以明廉政事本不修也而借三五條陳以  
塞責謂萬民作頌不足以當一二者之失  
懽也惟於津要傾心即怨聲載道豈能徹  
於

九重謂一意忠誠不足以致當事者之見悅也  
惟於聲華極意即實政不修誰曾綜核一  
事眉端粧束文采燦然可觀口語安排應  
對犁然可聽公差人一至庭除無不厚結  
面生者入其關市戒勿容留甚者偽開政  
蹟令父老達之監司嚴守街衢禁諸人不  
許建白日夜苦心積慮全與百姓無干下  
民怒不敢言上官稱不虛口

朝廷安賴此人為哉是曰狡偽之吏

一士君子生天地間七尺之軀等於二大六合之事任於兩肩須有正大骨襟勁直骨力禮節所在不亢亦不足恭議論所及不激亦不詭隨此非以干名犯分教物陵人持已之道當如是耳若奔走以為恭奉承以取悅觀眉睫為應對不顧是非探意指為從違惟徇喜怒鑽刺勢利門牆開創汚辱徑竇富貴利達豈不坐致而品格最卑卑矣是曰諂諛之吏

一自教化陵夷頑悍成俗衣食缺乏姦盜滋多此不獨百姓之罪也故為民父母之道不曰樂只則曰豈弟不曰慈衆則曰親民蓋雷霆霜雪在法司而雨露陽春在守令如有異常奸暴四境寒心久慣刀頑萬民切齒者間用重法以懲首惡甚者申呈遣戍益見法紀嚴明有何不可至於常犯自有常刑要在以刑罰為教化於撫字寓威嚴而已彼尚霸政者性既吾怒心不耐煩

常事櫻攢動輒夾扛一出門外不似人形  
一入獄中或登鬼錄其事已詳之提刑事  
宜矣是曰酷暴之吏

一一塵不染廉士所難本司不敢以苦節望  
天下但念一切公用既有綱銀加以額設  
之餘截長補短無礙之費送往迎來苟不  
私諸囊橐尚無玷於簠簋惟是犯人本無  
力也而強問有力賣兒女以完單問罪既  
納銀也而分外罰銀變產業以銷票王密

之金托腹心過送貧而理直者吞聲虞叔之璧借題目索求富而身卑者重足條編歎歎議銀既徵銀矣又分外有里甲之費怨徹閭閻夫馬日日供役既力役矣而雇募無給領之時謫聞驛遞官價買物

明旨屢禁也既減值而又賒之甚者分文不給無異明誑貧民賣貨所賺幾文也既應行而又稅之甚者叔帚亦抽何殊白奪盖耽耽入目而事事垂涎有不屑道者是曰貪

鄙之吏

茲十吏者上負

朝廷下殃黎庶友邦之賢者莫不共以為非矧  
曰憲司乃庇不肖以久民殃則余之罪浮  
於所庇者矣故列其狀而不指其人尚冀  
改圖夫惟使民不告病官不告難而予不  
失長厚之道也則幸矣

憲綱十要

須知附

憲綱者法憲之紀綱所以課吏治以安民



生者也故新官到任先通憲綱文冊報修  
舉也但郡縣登填原不理會監司接受亦  
不檢稽而

祖宗訓官要典遂為無用虛文矣夫按察以憲  
為司而憲綱不飭守令無辭矣責成者奚  
辭第欲一一核實則有司一一彌文徒茲  
繁贅耳今擇其要者十則首相商確賢有  
司各陳所見以驗才能如果加意民艱留  
心官守自有一種惻怛真誠妥確精識匪

獨循良稱職生民受福將憲吏且逋失察之罪矣設猶以文應與問而不應也按察之謂何豈能覩顏與二三執事素餐茲土哉一人才者天下理亂之由學校者人才邪正之地今無論朔望之視學希聞季月之考課久廢即有植桃李者拔英俊而厚加作興重菁莪者分會約而嚴行督責不過曰舉業云爾夫

朝廷懸賓興重典諸士爭進取榮階即不令有

司提調學官訓迪寧之鄉舉解額哉如曰  
學校惟為舉業舉業專以詞章則經書垂  
訓貽後人利達之資科目用人開天下富  
貴之路於身家誠得矣不知

朝廷取富貴利達人安用也堂曰明倫不亦迂  
腐不情之甚乎夫特立之英好修之彥世  
不可謂無人但自教指一迷學政久亡士  
終日聚談無一語講求道義終日誦讀無  
一字照管身心致知力行學術漫無用處

濟世安民事業了不相干匪獨諸生即吾輩何嘗非昔日諸生耶蓋自吾父師之父師所從來然矣余以為當慟哭幾絕而聞者乃大笑欲倒也夫教職為守令屬官而學校則守令提調曰教曰諭所教諭者何事曰訓曰導所訓導者何人提者提撕調者調習所提調者何效

朝廷命官之意顧名而思之應茹是否耶思昔盛時學有崇禮義之風人有士君子之德

修之家則規言矩行不以狎昵邪肆媿哉  
冠博帶之身命之仕則體國憂民不以勢  
利紛華改羔羊素絲之節今之人未必皆  
出古又下不知當時郡邑長果繇何道而  
臻此也茲欲以三物之教望今日誠恐駭  
人心目吾始為其卑近者所願有司於諸  
生相近所在不拘多寡各立會約每約給  
以進德修業印信兩簿擇年長而公直者  
為約正以察舉之擇通敏而博洽者為約

率以倡導之進德則先糾十二過如○家  
庭父兄鄉曲尊長有無薄情犯禮○淫邪  
婦女官私娼優有無姦通包占○鄰里地  
房親朋財物有無侵奪騙賴○鄉黨鬧事  
衙門公事有無干預請託○埔負錢糧交  
結黨與有無挾制官府○捩貼過惡聚談  
婦女有無生事造言○宮室車馬冠履衣  
裳有無豪奢敗俗○或騙貨利或報讐嫌  
有無唆詞健訟○或以貪財或緣醉酒有

無詈衆毆人○或包牙店或領秤尺有無  
把持行市○或交結棍惡或扛幫愚少有  
無賭博傾家○或搬弄是非或起編緯號  
有無浮薄敗群○士有免此十二過者即  
紀之進德簿中另加優處倘有希跡古人  
留心聖學脫凡陋之識有獨得之真者郡  
邑以報我當賓禮之提調教官俱署上考  
修業則先講十二政○地土不均糧差多  
弊何以釐定之○民無禮義俗不純朴何

以化誨之○宗室祿糧不足婚嫁失時何  
以存恤之○鄉無武備境多盜賊何以消  
弭之○公無積貯家無蓋藏何以備兵荒  
○疫癘饑寡凍餒流離何以使得所○一  
歲一督士青衿滿學宮矣士習何以不古  
○三年一舉賢縉紳滿天下矣民生何以  
不安○民疲於徵輸軍匱於芻牧邊餉何  
以使充○軍政則清勾日日馬政則俵養  
年年行伍何以稱之○三大營九邊天下



衡所士卒怯於見敵而敢於犯上何以使  
之有勇而知方○虛文日盛糜費日廣何  
以使之崇簡而尚實士有講明此十二政  
者即錄之修業簿中另加優處倘有存心  
宇宙注意民物懷堯舜之憂抱治平之畧  
者郡邑以報我當賓禮之提調教官俱署  
上考夫是權也假之士怠肆者視為文具  
而不肯行假之學官貪鄙者藉為利媒而  
反亂實要在賢有司有倡率之實心有稽

核之成法有激厲之良術耳今不能一一道也

一國家牧養百姓守令實其專官及考先王養政不出田里樹畜四字而已自巡行勸課之法廢而貧窮凍餒之民多山谷溝畔曠土迹墟得無可耕之地乎道邊牆下隴上岡頭得無宜樹之木乎大者豚羊小者雞鶩得無可養之牲乎糠粃可積藜藿可採得無饑歲之防乎絲綿可織麻藍可用

得無未試之法乎耕種失時耘耔不精得  
無鹵莽之業乎勤苦不甘游逸是好得無  
偷惰之民乎地各有宜民各有能得無未  
通之利乎百工技藝皆足自活得無可教  
之術乎諸如此類或上下山原或詢謀父  
老或嚴行稽察或時其督課或水利可興  
以備旱或預防蝗蝻以拯災或立官庄或  
鑿窖窠以招流或禁殺牛或賞積糞以廣  
耕養民之政不盡於此而此其大都也夫

為守令者聽民勤惰任其饑寒生死吾不知而惟繭絲是亟恐古循良必不爾矣余於東省得一賢令焉今大梁僉憲許公守恩之令鄒也鄒民不織而資布於鄰棗土宜也民又不樹棗許甚恨之令有地百畝者樹棗百種木綿十一又教以種法至秋而綿成又限以紡期稽其匹丈親下閭閻視勤惰而賞罰之明年鄰不來鬻布又明年有鬻布於鄰者值歲再饑諸郡邑多迯

亡鄒民以棗繼賑獨得全活百爾有司自  
昔誦讀時允言為政孰外養民試問養民  
今何道也余甚樂聞之

一積貯係民間生死當務之急有急於是者  
乎今預備等倉無郡邑不設矣蓋凶年以  
備賑貸兵年以佐軍興何者師行無餉則  
劫城守無食則變故米粟之積府五萬州  
三萬縣一萬五千歲歲出息而不貸凶歲  
出貸而不賑可當孤城三月之圍可支三

軍十日之穀蓋常變者不可必之事餼糧者難多備之物倉廩之設不獨為歲也今計不能圖目前奚問異日獨念萬曆甲申以來五年饑饉萬姓流亡聽其生死而莫之哀怒其劫掠而繩之法喪亂稍平恬不為計為民父母當如是否乎忍如是否乎昔人云揀荒無奇策責無備也無備之凶雖十堯舜不能生一人何者仁義不能為菽粟空手不能活枵腹勢也孟季云使有

菽粟如水水此備荒七字訣也今欲備荒  
莫如貴粟欲貴粟莫如一切之政皆以粟  
然而事權有在守令有不得專者惟是廣  
豐年之糴酌隨年之散凡官銀除正項起  
存外其餘新舊貯寄在庫各色銀錢但遇  
穀賤之年盡數糴買每年春散分為三等  
極貧平借至秋抵斗還倉次貧息借至秋  
加二還倉稍貧賒借以春放之直收秋成  
之穀其三借多寡之數悉令鄉甲長保催

以防逋負其倉分立於鄉村遠近之間以便出納不五年而粟倍倍則以額粟還官倉以倍粟為社本凶則當年緩三借之征大凶則極貧免還寡婦孤兒之貧者免還流移者免還息倍賒借者待豐而還名曰兩利倉

此兼義倉常平二法

○自邪教盛行民間修

寺觀崇鑄塑進香建醮無論富貧隨社錢者十九可痛加省諭改此錢為救命會錢一月兩會各量其力多者一會錢百或五



十以次差減極貧者錢亦十立為簿以約  
中之殷實公平者掌之不許放借以起爭  
端須穀賤之年盡數糴買露囤一處不必  
歛散以防侵冒至大凶之年誓神報官照  
本分給各救身家好義之人不願分領者  
官給旌獎其不積者不必督責另造名冊  
報官凶年公私俱不准賑名曰鄉會倉  
社倉之法  
但不出息○中人以上之產每歲所入分  
為四項先計糧差之用幾何次計凶荒之

備幾何次計衣食之資幾何次計應酬之  
費幾何歲有餘則增凶荒之備歲不足則  
損應酬之費甚者寧減衣食之資而凶荒  
之備勿減分毫蓋一日一食猶不至死十  
日無食必不可生此民間第一要務鄉約  
報其數目鄰佑稽其虛實積多者另加優  
獎浪費者罰穀入官名曰自救倉此倣周禮  
耕餘之法  
○此三倉者一在官二在民督責之則在  
有司外有隋開皇轉相灌注之法唐戴胄

每畝二升之稅宋乾德每石一斗之加熙  
寧五等出粟之令皆為備凶良策必須奏  
請方行倘郡邑更有精思不妨條議務期  
樂歲不饑不寒凶年不逃不死若急急於  
平日而束手於臨時此秦越其民之常態  
也非所望於仁人

一帝王為政首重鰥寡孤獨加意疲癯殘疾  
曰無告之民言哀苦之情無一可告訴者  
也彼其呼爺孃於街市忍凍餒於簷窰

民父母亦知有斯人否乎當襲裘擁火之時  
飫鮮饗醲之際亦念及斯人否乎監司不  
親民佐貳不當事舍郡邑長斯人無所歸  
命矣查得大明律內一款凡鰥寡孤獨及  
篤廢之人貧窮無親屬依倚不能自存所  
在官司應收養而不收養者杖六十未嘗  
限以數也今以錢糧不足而限之數矣未  
嘗不及篤疾也今瞽目跛足全不收養矣  
夫收養一人歲給米三石六斗布花銀四

錢錢糧原非有餘豈能盡人養濟本司昔  
在山東分為等差除強壯丁男遊惰不立  
及男子平日為惡曾犯徒罪以上婦人平  
日犯姦淫潑惡不孝不賢及家道原豐自  
已浪費者雖極孤貧衰老俱不准養濟雖  
孤貧衰老而近親遠族尚可依倚責令收  
存或瞽目而能筭卜絃歌或跛足而尚能  
織屨編席為繩結網量給工本或凶年倍  
賑亦不准養濟外○其餘孤老殘疾但係

六十以上責令里老鄉甲盡數報官逐一  
面審某某七十以上血氣衰羸某某雖未  
七十而老疾憔悴某某六十以上十歲以  
下瞽目殘肢不能為生共若干人作為一  
等盡數收養○某某雖年六七十血氣未  
衰尚有夫婦相依能為人抱兒守戶者作  
為二等待養濟院有缺照其年貌壯衰次  
序相挨撥補○某某雖係瞽目跛足而年  
在五十之外六十之內學藝則不能乞食

則無衣作爲三等擇於關廟寬大處所蓋  
房十五或二十間名冬生院作通炕一炕  
可容四五十人作數廣被一被可容三二  
十人連枕厚苫分別男女每五人以有目  
之孤老者料理其起居仍委能幹老人三  
二名火夫五七名主其飲食關其出入如  
煮粥法自十月初一日起至三月初一日  
止每早米粥每三人約一升午後炒豆每  
二人約一升守令仍於有罪犯人罰處

給皮襖皮褲各一件如無皮去處或給木  
綿厚大襖表裏二丈五尺新絮二斤者一  
件至罷粥之日暫令乞食度日待六十以  
上盡數收養○某某雖係瞽目而年在五  
十以下十三以上與夫養濟院之十歲瞽  
童今已十三者作為四等願學卜筭擇善  
卜筭者一人為師願學絃歌擇精於絃歌  
者一人為師其師月給穀一石其學者如  
煮粥法每日令人給以粥豆令學古今勸



民賢孝段落說書小令使其布散閭閻勸  
化愚俗有司委人每月考驗慢不學與傳  
習淫邪詞曲者逐出記名永不許收養大  
率嚴督一年在殘疾者終身可自存活可  
省國家歲歲米布之給而滕歌瞽誦流布  
民間使婦人女子野叟村童耳滿道義之  
言心浹古昔之事較之鄉約所講不更親  
切而周徧乎昔東省令如萊蕪呂君明倫  
選集民間善為詞傳者其感發處真使人

涕泣俱下其警惕處真使人毛髮悚然何  
處無賢有司但恐不屑云云耳富貴人家  
能收養此輩選有裨風化詞曲而訓習之  
是教養兼舉一大陰德事有司申呈扁獎  
不猶愈費百金教戲子衣錦食肉導奢靡  
之俗長淫惰之風乎是舉也十九笑余迂  
而余自謂不迂也仁人君子午夜深思之  
一諺云衙門奸弊八分糧地假令坐派分明  
催科有法開倉以時收納無弊而惟正之

不供也則雖日事敲朴不謂煩刑今也貴  
賤不均陞擢未確豪猾通積書而增升減  
合里老瞞官府而賣富差貧數畝之田差  
名種種一人之稅赤脣紛紛官不得其要  
領民不知其精詳甚者暗增千百十詭二  
三此坐派之奸也里老騙收花戶重納花  
戶適慢大戶包賠差催人衆則錢糧止足  
供賄賂之資地戶星居則里排日疲於奔  
走之役比限不分多寡一體鞭朴豪猾竟

不到官專責下戶或死丁荒地逼見在攤  
包或詭隱田糧致甲中受累則催科之混  
也民間輾辦糶賣為多律法徵收定於熟  
月今有司無日不催科矣雖各項差糧日  
用刻期而青黃不接勢必稱貸又有司終  
年比較里老終年催徵花戶終年辦納大  
戶終年坐櫃則開倉之害也及納銀到官  
垂涎於大戶之多收者巧名取派借口於  
有司之需索者橫肆增添有暗加一明加

二者既重取於小民又輕給於解役甚者  
無銀而空文起解或經歲而不問批收此  
收解之弊也其他編審頭役或傾人之家  
耗費里甲或逼人之命累苦者獨不見知  
奸巧者公然得志嗟夫非賢守令誰復留  
心余舉其大都與二三執事者商之○先  
將緊縣地畝清查詭寄欺隱及除豁王屯  
匠竈外得實在徵糧額地上中下各若干  
頃畝分釐緊縣應徵本折起存鹽站拋荒

等糧各若干石斗升合槩縣某項某項銀

力

力不許差明坐若干兩

各項差銀共若干兩

錢分釐槩縣九則人丁共若干丁每畝上

中下地各該糧銀若干差銀若干每丁上

中下門各該丁銀若干門銀若干以撒合

總條分縷析刻一書冊人給一本此槩縣

差糧一定之大較也然後造本折赤曆二

部（本色赤曆）凡係徵收米麥等項明開某

倉道路若干腳價若干斗頭若干費用若

干每石應收一石幾斗幾升幾合上五勺以

一合四勺以下免派如民情不便情願收折色於所

在倉口糴買者估計稍寬每石徵銀若干

如果徵銀即附於折色赤曆之內折色赤曆內開某里第

一甲一戶戶頭趙子各寫花戶姓名不許混以戶頭名下總領

緊戶上地若干該銀若干糧差俱在內若地原無差者只

開糧中地若干該銀若干下地若干該銀

若干差銀若干門銀若干丁銀若干以上

共銀若干一限納兩錢完則註完二不完空之

限納兩錢完三限納兩錢完四

限納兩錢分釐完趙丑趙寅趙

卯等同寄庄戶無丁下下則無糧各照應

出銀數分限並同銀一錢者不必分限俟

奉限一起完納其完字大戶手註止分糧

差丁門四款並不用各項差糧名色以亂

小民眼目以費造冊工力其有地有丁花

戶各照赤曆填給由帖一張令之存留執

照其各里里長各給完簿一本

若行鄉約只用約中



白納妙不可言諱見十便每花戶止占一行如云趙子

銀兩錢分釐一完二完三完四

完其完字亦大戶手註比限之日里長止

執完簿聽比○掌印官先查舊曆每年完

糧里分共若干開倉之前出一獎示寧寬

兩限再不差人下鄉再不鎖拏比責以示

優禮善良之意其奸頑里分花戶擇銀數

多而戶則高衆人已納二限而彼尚不納

分毫者先點三五人馬上鎖拏枷項令催

本里錢糧完日始放○又出一示各里納銀分有定日某里某日但過一日者不收花戶親納里老代納者各責其路遠銀少花戶不願親納者須親伯叔兄弟子姪親甥舅婿岳方許代納糧差俱完之日里長通完簿掌印官於簿尾親註本里俱完四字以印鈐之仍付里長收執○如有荒逃地土查承種何人如無承種者須寬限招開如蕪薄不堪者寧搭作拖欠決不可令

里排戶長包賠升合死丁即與除豁逃丁  
十年以上邇無踪跡者亦與除豁宗族里  
甲有丁者報補如無於各里各甲有丁者  
報補如無寧搭作拖欠決不可令里排戶  
長包賠分毫其孤老廢疾無家無地之人  
既不養濟盡與除丁不然亦不過逼之逃  
且死耳所除丁地錢糧果在八分之内寧  
於見在丁地多增毫髮亦不為虐蓋衆繁  
易舉甚於獨累難堪况荒糧地死逃丁未

必十分之三也今工部員外郎李公瑞者  
昔令鄒平有二三里分地荒丁貧差糧難  
辦逃者不敢復業公招之來以槩縣之皂  
快門禁轎扛馬騾等夫盡給本里貧丁令  
之應役除准本身錢糧又得各里工食三  
年而逃亡盡復荒蕪盡開隨宜酌量在有  
司者盡厥心耳○錢糧十二月皆有緊急  
使用而徵收須在麥秋兩時以一兩為率  
夏辦頗難六月初一日開倉七月八月完

足令納四分秋辦頗易十月仿一日開倉  
十一月十二月完足令納六分即下下人  
戶與人鋤穫田禾掇拾柴草轉辦亦有藉  
手改移於兩時趁攢徵收支解於一年消  
息緩急賢者自有良法其詳不能盡述也  
○緊急差糧刻期起解支銷者如正月用  
度預於十一二月編發赤曆於上六則人  
戶計費先徵公私兩便徃見慢令致期者  
止取辦於大戶致令負債傾家先期催徵

者又槩及於小戶至有逼極鬻子急於前  
以苦頭後緩於後以惠奸民彼昏不知虐  
孰甚焉○徵收不須加耗自有贏餘昔余  
知大同日正行投櫃之法較以戶部法馬  
為准等約曰多收一釐者簞如數有收銀  
五錢而重三分者余簞之三十枷號一月  
及折封每封掣驗有不多者有多三二釐  
者計數萬封總重六千兩積出羨餘二百  
三十兩有奇傾銷工食添搭火耗查盤罪

名循環使費冊簿赤曆單票紙張工食盡  
取給焉乃知積少成多物理自然或曰使  
下令少納一釐者箠如數則積羨又何如  
耶蓋當時亦有行之者矣吁何異大戶之  
明暗加收哉民心如鏡民口如川自愛者  
思之○富庶之邑宜條鞭法一切工食收  
銀在官從公給散貧累之邑宜由帖法各  
役明坐工食給之花戶定以下上下中人  
戶近城一二十里之內者令之自行討要

蓋上六則富留以納銀下下戶零難為夫役在有司調停之耳○重差自驛遞召募後惟有大戶庫役館夫買辦里甲猶稱累苦苟勞其身而不費其財何苦之有民猶稱累有司可知近奉

明旨里甲不許賠錢買辦不許削帳行戶俱照民值不許賒欠違者本司訪知經行叅提罷斥○近日驛所夫馬之數裁革夫馬之銀減少支銷走遞站銀月不可缺比各役



工食更為緊急而有司視為緩圖此近日  
一大累○祖軍設有三枝第一枝從軍是  
曰軍籍則清勾者第一枝之子孫至於兩  
弟不魯從軍即係民籍法難混攝犯充永  
軍止用在戌所生頂後犯前子孫並不清  
勾此題

准事例也召募受賞軍人止是終其本身果逃  
則取當房兒男補役惡騙賞也果老且死  
子孫亦不清勾謂無籍也今州縣不分清

白一體追呼騷擾殊甚至其應解軍丁反  
被吏書影賣觀清軍而有司之政可知矣  
一宋儒羅從彥云教化者朝廷之先務風俗  
者天下之大事故上有教化則下有風俗  
俗之美惡其機固不在民也三晉民俗大  
都鷙悍而少和平嗜利而輕骨肉健訟而  
寡忠信椎魯而不文雅豈獨風土亦漸靡  
致然當唐虞時夫非所謂時雍風動比屋  
可封者乎為廢弛者之說曰風會日流人

心不古以古道治今民是障狂瀾而西也  
嗟夫斯民也亦嘗勞來匡直輔翼之乎亦  
嘗使之自得又振德之乎倍皋陶之功而  
半其效吾猶曰民可教也况教法既已湮  
沒教言又復絕響閭閻則鄙野成習不知  
孝弟禮義為何物市井則貪詐是圖不知  
忠信慝耻為何事為人上者亦相與沿襲  
恬然不復動念自昔詩書所誦習若繪衣  
塑食不可施之實用果爾則詩書固可焚

也念二帝三王之教未嘗不宜於今日然  
有司猶謂迂遠若

皇祖教民榜文及

聖諭六條旌善申明二亭非

時王之制乎二三執事必有着實舉行化民成  
俗者而予未盡聞本司向巡東省徧訪民  
間有憫老父孤寒冬月共榻煖足因妻不  
悅而遂出其妻者有以二驢趕脚為生忽  
被隣人盜去後事發召之認乃白渠借吾

驢久商不還非盜也而盜遂得免者至於  
貧家婦女少年守節艱苦終身者徃徃有  
之此皆窮鄉遠鎮單族寒丁在彼固不知  
何者為名有司亦不知此人為善及所稱  
孝子順孫義夫節婦皆力足以致聞或城  
中之易知者至於鄉飲所舉不論有德無  
德惟爵位是尊鄉賢所入不論公是公非  
惟體面是重其樂善好義君子未聞獎賞  
一人犯法警迹人戶未見示懲一人嗟夫

何處無良民何民無良心上不重德而望  
民之興行不亦難乎不知二亭之設何用  
也所刻鄉甲約一書雖近瑣屑郡邑果能  
以實心行實政責實效免而無耻之風尚  
庶幾哉若德禮則賢者自能倡之非本司  
所敢槩望也

一衙門及鎮店鄉村各色人役皆食民以自  
贍虐民以自逞者也多一人則民受一人  
之害減一人未見廢一人之事彼其憑城

勢假虎威小民豈敢與角即有被其害發  
其奸有司豈肯與直執一失衙門之心終  
身之懼但傷一人之體衆人之讐此牢不  
可破之弊也為民父母果欲子惠烝黎則  
清戒衙門最為首政信崇左右是曰極昏  
且如皂隸止為行杖把門執爰清道編審  
正額不為不多掛搭綽攬可不嚴禁快手  
催促急事防護遠行足用而止至於青天  
捉鎖接遞老人聽事陰陽之類各查其事

食果否相當勞逸有無均適門庭倉獄守  
夜巡風應否添撥火夫公事差發公館修  
葺曾否類及街民冗者應革則革累者應  
優則優務令無偷安肆志之人無獨苦重  
勞之嘆此衙門之清也各里既有老人里  
長又有地方保伍又有總甲小甲又有邏  
官堡官又有集頭老人一家而數人管束  
一事而亂接单票錐末之過張聲勢而詐  
錢財瓶儲之家指呈報而嚇酒食懦夫蚩



氓望公門如隔九關衙虎里豺通氣息如  
出一鼻豈無抱屈鳴冤不過賠錢受辱盖  
護庇衙門者庸吏常情壅蔽有司者奸黨  
積習故與其防之也不如省至於約正副  
保正副往年皆用貧無賴者故屢犯屢應  
僅同僕隸今選保正副皆殷實自愛者為  
之選約正副皆老成有德者為之得人誠  
難是在賢明有司經目留心鄉甲百姓連  
名公舉耳舊堡官賢即以堡官為保正舊

總甲可即以總甲為甲長惟居之遠近是  
便惟人之賢能是求公事不必排班聽委  
朔望不必作揖升堂無事不必回呈遞結  
此間閭之清也中外若此肅清而賢守令  
總理於上時稽其奸弊常振其廢弛又禁  
巡邏兵壯一切擾民擺路鎗夫百凡動衆  
如此而小民得一日息肩則得一日奔走  
衣食而差糧亦易以辦納矣

一憲綱合屬衙門不有所謂醫學者乎醫官

欽選於銓曹醫印鑄頒於禮部醫生則其教習  
之人惠民局則其施藥之所

朝廷仁壽斯民意極懇至矣今醫學署印者既不識岐黃丹素為何書醫生在官者又皆以接遞聽差為本役其開鋪招牌挾包賣蕩之人有書者全不理會病情藥性懵然不知無書者止記單方大病危疾悍然下藥有餘不足同治內傷外感倒施以至巫婦師婆等衆專治婦人小兒毫髮不知極

蒙信任有命者或活二三誤殺者十居四  
五夫兇徒折跌人肢體尚發邊衛充軍充  
軍未至死刑猶且數經駁問今庸醫以一  
劑之藥滅一人之命病家不詳所謂死者  
莫知其由如此冥行毫無罪過慨自王政  
久衰官業多曠談及此事便謂迂濶不知  
陰醫二學雖則並建而緩急之務奚啻霄  
壤所望二三執事以民命為至重以舊政  
為當修醫道雖不素習醫書豈不認識先

修醫學一所

次置本草一部

或湯液或發

篆醫書一部

或醫學正傳或心法附餘或

古今醫鑑或明醫指掌或醫

學入門或玉機微

意或仁齋直指次下令城市鄉村不分

土居流寓但有精通醫道者考選一人申

呈上司給與冠帶使掌印信次下令四境

行醫人等不分男婦俱委佐貳會同醫官

考試各認方科分為三等上等堪以教習

授讀醫書中等不通文理令記單方下等

止許熬膏賣生不許行醫其醫各自教其

妻以胎產調經痘疹驚風等方藥師與人等又受學於醫人之妻但有疑難病應必須請問醫學如婦人不學不問擅自行醫者將夫男重究婦人杖革三等之外不堪行醫者盡數帖名徧示遠近不許招呼凡在醫學者置籤堂上掌印官或醫委佐或首領各限以書隨其每月拘背一次驗其生熟問其義理精熟者本生量賞醫官同賞生疎者量責醫官紀過一年之外驗其稍通者

病家迎醫許醫官量能撥發仍置功罪簿  
二扇許病家親報治效者登功簿不效者  
登罪簿以憑有司賞罰三年學成方許給  
帖陸續發散各鄉村集鎮聽其行醫仍各  
給官簿一扇治效者病家親手登記滿百  
人者驗實送扁旌獎仍聽四季考試每州  
縣於編審均徭之年大郡邑四十八兩次  
三十六兩次二十四兩除醫官照雜職吏  
典月給倉米一石外其銀置買藥材雇覓

炮灸以救貧民無藥及天行瘟疫施舍及  
賞賚醫生勤敏之用不許有司扣減藥銀  
不許醫官私用藥材其醫生量供醫官束  
脩及醫官出治本縣士民者聽從其便但  
不許妨悞教習其續收新進者仍照前規  
教習庶病家不至夭其夭年醫人亦得裕  
其生計亦有司仁政之大者也

一盜賊源委不可不知酒肆娼門賭室其招  
聚之由窰場寺廟孤庄其隱窩之處壯年



僧道乞兒其窺探之人各處閒懶游民其合夥之輩夫盜也設從天降地出真無柰彼何矣彼其能不與人同里而居朝夕相見乎彼其生理經營里人寧不聞乎所與交遊姓名面貌里人寧不識乎縱令孤庄彼豈無親戚宗族朋友之往來其行藏能盡塗人之耳目乎乍貧乍富潛出潛歸或消沮閉藏或豪雄自詫言動不同狀貌自別蓋誰為盜誰不為盜里人辨若白黑日

躡足附耳談之矣然而不以聞官者何彼  
為盜與我分毫無干我發盜其禍旦夕立  
至者也故上之責成也嚴則里人畏吾法  
而不畏盜盜雖讐里人而不敢讎法里人  
不畏盜則盜無所容盜雖讎里人豈能盡  
讎一里之人哉以是知舍鄉甲法雖聖人  
無弭盜之術矣今陳其畧如左○一曰禁  
游惰之民夫各安生理此

聖論也不農不商不工不傭而游手粧身亂混

閒談捕鳥鬪鷄彈絲蹴鞠此何物也世未  
有身惡勤勞口恣甘脆不遂所欲而不為  
盜者以後不分貧富人家但有此等子弟  
鄉甲盡數報官另籍一冊號曰棄民簿言  
天地間之棄物也編諸鄉甲察其動止朔  
望點卯問何營生地方但有失事即如  
此輩根求不但防奸亦驅民着業之一法  
○二曰嚴流寓之民夫流來寄住皆貧無  
賴之人未有不僦人房屋佃人土田依人

窩場者房主地主先查來歷更擇保人編  
入庄頭自行管理仍各造冊送官但有防  
範不嚴地方失事獲盜之日審係誰家居  
住者不分強盜竊盜曾否知情分贓俱以  
窩主坐罪有能早知而逐出本家者犯後  
免其併究早知而捕送到官者俱照獲盜  
重賞見鄉約○三曰逐強壯之乞人除瞽目  
跛足及七十以上男婦十三以下小兒不  
禁外其遊食僧道乞食壯丁或強宿寺觀

住持須得容留或暫寄窰場主人不敢訶  
逐或三五圍坐門前動求米足布或墮  
目勁索飯食不遂便出惡聲官吏情不詰  
奸閭閻誰不懼禍為過計者之說曰此輩  
不宜驅逐聚結反為大患嗟夫彼不生於  
空桑寧無原來籍址除傭佃經營習土安  
業及失迷鄉貫者聽其寄住外其餘一一  
清還原籍僧道則令本土住持收管焚修  
壯男則令本土里族收管着業或有司別

立計處閒民之法

詳在別議

凶年離散一番豐

年查歸一番律不有發還元籍之條乎強壯乞人每郡邑率不過百人耳即隣境未肯通行而嚴督保甲不令容留但係境內失事者先坐容留之主則此輩無潛踪之所矣○四曰重捕獲之賞諸色人等但有於劫所殺賊一名或生捕一名係竊者審實賞銀五兩係強者審實賞銀十兩獲火盜大盜一名者賞銀二十兩獲強盜三名

以上者除賞外仍鼓樂花紅送扁五名者  
申給義勇冠帶專管巡捕永免本身差役  
其銀即懸於州縣門前朝發暮收獲盜得  
實者准其徑取○五日禁娼賭之徒四民  
之業三五為群良善之人數十結社有何  
不可凡係棍徒但有成群合夥寺廟賭博  
或開張之家收打頭錢者鄉甲指實密報  
除問罪外枷號遊迎拘當苦役仍重賞告  
人娼優之家但有不識姓名男子使錢寬

綽色狀張皇即密報有司審實者一體重

賞貪財容隱者事發一體重究○六曰緝

窩盜之主

見盜賊條

夫盜之去住無常而窩之

居處有定盜之踪跡猶秘而窩之舉動甚

彰盜之勢大而窩之勢孤語曰除蜂摘窠

故窩禁不可以不嚴也或曰雲集鳥散亦

有無窩者曰固也無窩之家其盜必近豈

能除劫掠良久之時分賊擾攘之後一更

五更之間自三十里外而來出三十里外



而止乎故窩能首盜者免罪獲盜者除免  
罪外一盜准一盜之賞諸人能獲窩得實  
者一窩准十盜之賞○七曰寬首盜之令  
州縣平日下令凡係三族之親不分有服  
無服但肯首盜者與盜自首同不犯姦殺  
俱准免罪保甲隣里密揭報盜者半獲盜  
之賞隱忍不首者盜犯之日即責三族及  
本甲隣佑跟捉比較盜獲方准釋放○八  
曰密遠僻之防郊關村落人烟輳集保甲

一嚴盜自衰止惟深山窮谷人迹罕至雖  
無可劫之家多棲行劫之輩除有庄田勢  
難遷移者聽其孤庄仍於隣近十里之內  
立一團長令其挨家三三相保團長統之  
一家為盜兩家同首不首者別三發覺團  
長申呈兩家與盜同罪其結山為寨者就  
立寨長以保甲法統之仍以禮義化之負  
固為盜者或招撫而散處之或墜其山谷  
不與民通或夷井伐木不使安居甚者以

兵勦擒之○九曰清邊鄙之民三界首間  
民同里而分屬彼詰則竄名於此郡此拘  
則逃身於彼邑三處之法不得加焉而守  
令互私其奸宄以讎隣此盜藪也凡係邊  
境兩下共立鄉甲彼此會行法令倍設保  
正凡有盜發即許所在鄉縛徑送所在有  
司但有回護留難者申呈合干上司官吏  
提究叅治○十曰練鄉甲之兵十家為甲  
家有兵十甲為保保有警

祖宗之法豈欲空有此具而不許其練習哉今  
家家有武備而人人不知兵徒資盜耳若  
於各保之中不分主客戶但係久住者二  
十以上五十以下除傭作者貧無衣食者  
有占役者不用外其餘盡屬保正副統之  
十月納禾之後三月未農之前將各壯丁  
在城分為四面在鄉分為八聚官募各藝  
教師十二人各給工食使習之  
兩保三保  
共覓一人  
更一二處教習弓矢一二處教習刀鎗一

二處教習鞭棍十二處教習擊擲一二處

教習火器每處分為兩隊隔日分番朝食

而來夕食而散

遠近酌量務在十里之內

一年之後不

用教師調藝互習彼此相傳有司分日親

臨觀其技藝或東面與西面角短長或南

聚與北聚比生熟一年賞次能者二年賞

上能罰不能者三年罰寡能者四年而人

皆知兵矣然後各歸保甲自行練習如是

而人懷技癢之心惟恐無盜可擒盜擒後

死之懼安敢公然行劫耶是舉也可以攻

戰可以城守兵年保聚以防家募時倡率

以勤王乃彌盜特餘事耳其法詳在練鄉兵議○十

一曰嚴盤詰之法今制凡人出外皆於奉州衛縣告給文引回自

銷引此法久廢今擬以凡在保甲之人不牌代之猶有存羊之意

分主客貧富各給一護身牌如今公差不

一面寫身長若干年歲若干面長圓方有

無麻疤癰瘡鬚鬚屬某縣某保甲軍民匠

竈籍一面寫佳居城南北東西某地方父

母妻子何名姓各保甲造送州縣官刻畫  
押字點硃用油而給之凡保甲中出外之  
人除所至不輸五十里往返不過一日者  
免其隨身外其過一日及出境者俱於保  
甲給假佃戶賃戶給假於房主地主牌隨  
身行出關入店遇有盤詰者以牌為驗所  
居地方抄牌備照無牌及人牌不對者拘  
審行查其在家者交接面生之人保甲隣  
佑嚴問姓名所得可疑之物保甲隣佑嚴

問來歷每出不歸之夜保甲隣佑記其月  
日以上盤詰皆其人素不端良其跡素難  
憑信者若忠厚謹飭之人及有身家體面  
人所共信者不許一槩瑣屑○十二日重  
保正之選見鄉約○十三日明夜巡之法夜  
禁之令以一更三點禁人行五更三點放  
人行禁後放前凡有行人除公務急速疾  
病生產死塋不禁外其餘不分士夫嚴禁  
夜行凡夜行者不分面目生熟俱要拘留



送問諸人不夜行則夜行者必盜矣盜見  
無人夜行難以影射亦不敢夜行矣至於  
夜巡門前最緩而宅後為急蓋門前多空  
房無可盜之物門前係通衢無隱身之處  
盜所從入宅後常十九也柰何專擊柝於  
通衢哉巡城巡夜法見別議至於集鎮鄉村亦當輪  
流巡夜即不出戶要須徹夜有聲使知人  
犬非睡熟也○十四曰責救護之疎見鄉約  
一國之大事在祀而須知三十一款首曰祀

神且學古入官惟有兩重夫非人民社稷  
乎若今之祀事不若不祀猶免禍於神明  
耳壇遺廟宇宿莽積塵神主龕籠傾欹破  
毀几案皆鳥鼠之踪庭除有人畜之糞及  
祭祀屆期齋戒視為虛文執事何嘗告戒  
拂拭者垢膩重重滌濯者污濁累累蒞醢  
不問熟生犧粢未知精潔帶泥連草之菁  
芹含蛙蒙塵之棗栗凡百供陳盡托僕隸  
師生且不躬親有司安肯省視不過五鼓

排班勉強一拜而已夫頒賞下人猶必有  
禮乃恭承大祭全不經心鬼神無知祭可  
已也鬼神有知寧不吐乎此與放而不祀  
謂祭無益者相去無幾矣夫尊崇功德以  
勸烝黎祈報春秋以福境土是有司一身  
神民所依也况修葺整飭為費幾何歷覽  
嚴督為勞幾何是可苟也寧有不苟者乎  
外如先朝陵寢或踐踏於芻牧牛羊前哲  
子孫或流落為傭乞廝卒者亦當表識優

恤以示重道之意其餘庵觀寺院見在者  
改為鄉約未修者嚴行禁止仍查照教民  
榜文使庶民之家所在鄉約薄出會分或  
豕或羊果酒香燭於春秋二社報賽土穀  
之神止用鼓樂不許娼婦誼雜媼言嫚語  
褻侮明神招生禍變其家庭靜舍或寢室  
中間各於應祀祖先有主設主無主為位  
家長每日早起一揖遠行出入焚香再拜  
婚姻生子生辰隨便陳設告慶新物初熟

伴以酒食告薦四時哀節忌日牲果酒食  
告祭物不在多惟其誠禮不在文惟致愛  
不獨報本追遠見民德之厚而習禮存心  
之人自無凶器奸盜之事矣

### 報政實單

山西等處提刑按察司為嚴署考之法以  
驗長吏淑慝事照得本司職專廉訪事貴  
核真近據各州縣季報賢否文冊虛文濫  
套避怨市恩註來句句褒嘉安得人人賢

聖夫近莫近於同事之官寮真莫真於經  
年之聞見以為不知耶則寮屬善惡漠然  
不動心思士民怨德愴然不入耳目長吏  
之才識可知矣以為知而不敢報耶非政  
無紀綱我無以服彼之心則身有指摘彼  
得以箝我之口長吏之品格可知矣柰之  
何操守卑污者尚曰一毫不染才能踈短  
者猶云衆善兼長以衰頽為精壯止騰脚  
色云云以惰慢為勤勞漫不知何事事但

取同官感德不恤百姓為讎此皆近日所謂盛德長厚恐

朝廷建官之心長吏率屬之道應不如此夫為長吏者誠能正己無私勤民有素或得於觀感者同心佐政或束於嚴憚者砥行持身彼不辜受誣吾即以去就保之有何不可如果卑鄙不才昏庸難策我節愛而彼貪殘我振作而彼廢格或奉承以取悅或壅蔽以行私苟有公平正大之心寧無督

率鈐制之法況可庇不肖以玷已之聲名  
哉為此定為新格務要備細實填倘故習  
牢不肯破而所報不與聞同本官即以同  
惡相察並置下考至於守令居官事實往  
皆漫然無據士君子懷為國為民之心居  
得行得止之位豈無良法善政加於庶民  
者乎即自到任以來或係便宜施行或曾  
申呈詳允者逐一細開以觀實政文到即  
同寮屬實單密封速報須至冊者



計開實卑填式

本職自到任以來行過宜民事蹟

一件

一件

同知某人某處人由出身年約有

十歲

正壯頗衆  
尚壯已衰

貌

中材  
清秀

心

明白  
真誠

才

潤大  
平常  
利便

守

頗污  
不貪  
清介

政

勤敏  
酷刻  
要事  
實  
寬大  
柔儒

不揚

誦詐

精細  
疎拙

大壞  
要事  
實

判官縣丞主簿以下俱照此格填造

佐貳  
合屬

善政亦令本官自開不拘多寡但要指

事掌印官仍體訪真實造入實單果非  
實事不許扶同

考語只用詞不係先賢而後改節先不肖  
而後改圖者不必再報倘前後不同許  
不時更換考語馬上差人馳報若朦朧  
隱忍致賢否矛盾者責在長吏

府填本堂佐貳首領合屬及州縣掌印正  
官俱照此式其州縣佐貳首領合屬不  
係賢不肖之尤當薦獎戒斥者該府不

必造報

風憲約終